

Lé corbîn et lé r'nard par Jean de la Fontaine

Jutchi haut sus eune branque, Maît' Corbîn
T'nait un bieu fronmage dans san bé,
Attithé par l'odeu, un r'nard malîn
Adrêchit ches patholes au sot ouaîsé:
"Hé, bouônjour! Moussieu lé Corbîn!
Êt'ous joli! Tchi bieu plieunmage, man vièr anmîn!
À dithe la véthité, jé veurs
Saver si, dé touos les chanteurs
D'chutte forêt musicale, ous êtes, par chance, lé rouai?"
Ches mots fliatteurs du r'nard remplyîtent lé corbîn d'jouaie,
Et pour lî mouontrer sa belle vouaix,
Il ouvrit l'bé. Et l'fronmage? Ah, i' l'laîssit tchaie!
Lé r'nard l'mangit d'un co et dit: "Man chièr Moussieu,
l' faut apprendre qu'un affliâtreux
Vit bein ès dêpens des cheins tchi l'êcoutent.
J'dithais qué chutte léçon vaut un fronmage, sans doute."
Lé corbîn 'tait tout morfondu
Et juthit, mais trop tard, qué nou n'lé triqu'thait pus.

Go to the [Learn Jèrriais website](http://www.learnjerriais.org) to find the audio version of this...

www.learnjerriais.org

